

四庫全書

集部

欽定四庫全書

集部  
十五家詞卷十八

詳校官內閣學士臣尹壯圖

侍讀臣孫球覆勘

總校官降調編修臣倉聖脈

校對官中書臣蔡廷衡

謄錄監生臣楊聿修

欽定四庫全書

平五家詞卷十八

休寧孫默編

陸求可月湄詞一

序文

溫和生而花間作刻羽引商李晏出而草堂興諧聲  
依咏淮海漱玉倡溫麗之微言稼軒放翁極雄豪之  
變態投袂而赴節詠歌朝廟之端比事以屬詞悵別  
都門之外管絃所協作者擗腴搴芳詞令斐然聽之

驚心動魄洵元音之鼓吹衍樂府之源流近代而還  
指不多屈用修元美幾同秦柳升堂徵仲眉公亦比  
歐蘇入室張右文纂圖譜恰在泯絕之日錢功甫輯  
詞華適丁散佚之年各出新聲俱標艷體多有緣情  
雅作寧為累德徵詞碧雲紅葉之章共推揚於丈正  
楊花謝橋之句猶許可於伊川蓋假物而行吟實賢  
者所不免未可呵為蠟屐奚容等若雕蟲僕解絃偷  
閒讀書懷古咏綠肥紅瘦不覺魂銷吟殘月曉風能

無技瘡爰尋聲而按譜遂累句以成編託景言懷或  
緣感激而歸曠遠逢時攬勝或因歡冶而起悲愁卉  
葢涉趣於朝昏蟲鳥爭妍於遠邇假閨房而矢詠豈  
曰淫哇望古昔以具言敢流憤激風雲月露盡入筆  
端尹吉姬姜俱供詞料寫生體物未造語入微惜別  
徵歌將深情如訴厥類既廣為調良多翰墨怡情竊  
愧短轅之犢聲歌娛志猶賢長日之棋藉以消憂用  
茲捐忽隨時銓次間多先後之殊辨物成章弗別短

長之體誠知蓬垢自喜未窺傾國之令安然而瓦缶  
雜陳或當拊髀之雅好情詞刺謬倘蒙一顧於周郎  
教誨殷勤願貺百朋於陸子庶乎挈微蛙皆井得窺  
蒼昊之全轉尺鯢蹄浴獲識江河之大敢云齏白聊  
備芻蕘

清平樂

催春

忙呼百舌來報芳菲節黍谷鄒陽吹律切早晚菖蒲縮

結 五原消息嫵遲楮鞭行令無私青帝重來巡狩翠  
華芳草天涯

中興樂

第一體

立春

寶騎迎來日載陽東郊瑞綰晴光土牛畔野老話農桑  
洞庭春色黃柑子梅園裏五辛盤舉斟酌處景初長

唐多令

元日

四始轉芳洲三微啟孟陬獻椒花頌出妝樓聚飲屠蘇  
誰最少添一歲更風流閨闈在螭頭衣冠拜冕旒賜  
醪醑白獸樽浮朝罷金蓮花炬散曾記入火城遊

訴衷情近

人日

入春七日便覺韶光輕轉梅花飄雪簾櫳柳色弄晴庭  
院多少竹房松塢野店山橋早聽倉庚轉閨情倩綵  
翦桃花人面屏風金箔帖遍教誰見登樓盼知伊思發



花前隔斷關河鄉  
縣寫盡鵝溪絹

金縷曲

試燈夕

洗出新春月正竹架松棚逼近上元佳節巷陌笙歌香  
暗度望見高樓殘雪啟繡戶藏燈重疊提出錦箱銀燭  
換碧玲瓏齊掛雕梁鐵斗柄轉衆星列玉堂綺宴琉  
璃澈乍舉頭瑤天朗淨低通藻稅漏箭不催金吾醉侍  
女頻添雞舌且一任蘭膏明滅未過傳柑三五夜儘燈

花開箇同心結初試起水晶熱

霜天曉角

元夕

新正月半皓影連雲漢偏鬧六街燈火好月無人看

喧闐簫鼓亂旦旦如何旦歸坐小山梅下香茗幾人清  
玩

傳言玉女

元宵獨酌

巷陌如雲盡是冶游兒  
女斜陽初下看烟含  
蒼嶼銀蟾皎潔第一團  
團時序漫尋良友且斟  
芳醕滿院梅花竹兼松  
對蠟炬歲寒三友勝廣  
寒仙侶家童報道門外  
燒燈如許驟然點首擎  
杯無語

玉漏遲

元夜有懷

姮娥清鏡滿良宵偏稱  
燒燈爲壽到處笙歌五  
夜明如白晝火樹星橋  
不斷更寶馬香車馳驟  
真輻輳貧家隘

巷下機拋繡 何如試鼓狂生著單絞  
岑牟揚槌恐後 三弄漁陽四座盡  
傾節奏今日風流名士想惟有傳柑  
依舊聽玉漏低徊漢書時候

河傳 第八體

元宵風雨

上元風雨補天何處一街春水玉樓深  
宴設洞庭柑子 窻明燈影裏 山棚溼透  
殷紅紫羞簪珥閒殺尋燈履 廣寒宮  
雲影中空濛無橋駕絲虹

摘得新

閏元宵

閏孟春喜見月重輪青藜雙照我讀書人一年兩度正月半踏歌頻

念奴嬌

第三體

花朝

中和過了又花朝清霽無邊烟景水綠天青歸雁喜風暖一灣漁艇嫩柳園亭新蒲池館寒盡松筠嶺樓臺初

啟曉來翠袖輕冷 堪愛細草芊綿踏青絲履轉過鞦韆  
影暗禱封姨休折損穠李緋桃紅杏上苑金鞍後庭  
玉樹都是神仙境芳菲撲蝶為誰良會馳騁

惜分飛

上巳

溱洧遺風多芍藥好訂蘭亭春約曲水流觴酌因修禊  
事看魚躍 匝樹花芳鶯語樂鬪草東風池閣可有金  
人落水心長劍凌波托

柳稍青

第一體

寒食

細柳生烟天桃吐火寒食春天茶竈停炊熏籠罷熟冷  
落榆錢 佳人爭戲鞦韆飄蕩處依稀半仙一騎紅塵  
九門魚鑰樂事無邊

玉女搖仙珮

清明

官場蹴鞠禁院鞦韆處處亂紅輕綠樓閣蓬瀛山河錦

繡無數衝花騎竹極望烟盈目盡新鑽榆柳早傳宮燭  
知多少王侯第宅薄暮笙歌宴飲金谷舞試踏青鞋越  
艷吳娃湘裙六幅 昨日燕泥溼透柳絮飄遲春鎖一  
天霖霖思婦夢回行人魂斷紅杏村墟酒熟更喜逢晴  
燠競嬉遊隴上墻間風俗看一路紙錢飛蝶杜鵑染淚  
淡粧濃抹嬌聲哭歸家兒女燈前簇

送入我門來

端午



劍倚蒼蒲虎牽白艾清尊滿泛雄黃四海天中千古號  
端陽剛剛五月逢初五近短至書雲夜漸長能續命多  
少纏綿絲縷沐浴蘭湯信是懷沙堪弔飛鳧一時競  
渡澤畔悲涼今作歡娛誰斷汨羅腸紅裙妬殺榴花色  
看眉黛凝萱草奪將笑粉團角黍小弓戲射中者先嘗

賀新郎 第二體

閏端午

記得逐龍舟甚枝頭榴花盡重開如簇繡戶佳人擊

綵線艾索垂垂金屋再一度蘭湯早浴新樣釵符雙鬢  
滿聽溪頭十里笙歌續解菰黍連昌歎 靈均休向歐  
回哭喜今年五絲棟葉兩番風俗料想騷魂千載下波  
底不愁枵腹何須怨龍潭蛟谷只有蟾蜍和蝎虎恨羲  
和置閨心何毒兩月裏偏相捉

巫山一段雲

端陽值雨

雨洗江心鏡無陽午不端暫將飛白扇盤桓榴火溼生

寒 受水烹棗易揚鞭躡柳難葵花向日示人看祇是  
寸心丹

金人捧露盤

七夕

孟秋天將弦月可憐宵看銀河烏鵲填橋黃姑無賴不  
容天女織鮫綃瓊樓玉宇金風起離恨初消 笑人間  
陳瓜果求蛛網望雲霄薛瑤英連理花飄流星未墜深  
閨爭喜得蠨蛸庭中柳子多文藻借景逍遙

離別難

閏七夕

歷正巧弄牽牛頰他兩度離愁嘆癡人不解羨歡娛得  
再那知今曉別綵橋頭音信絕銀河濶平添幾尺淚波  
流 雙七夕支機石離別難霓裳比昔增寒重奏于闐  
樂頻駕臨風鵲曝衣乍展先乾良會速依然獨玉梭金  
鑷暫盤桓

卜筮子

立秋

暗裏送秋光，不管愁人怕。偶向梧桐樹底行，一葉當頭下。風起小池寒，露溼蓮房卸。引動當年舊性情，無數悲秋話。

殢人嬌

中秋

飛鏡當空萬里無，雲高掛綠粉。溼愁天，易化繁星退避。更三星低亞，涼世界一片水晶無價。雲際鸞車山頭

鶴駕折桂客望姮娥嫁樓臺白玉奏霓裳初罷明入畫  
恐博望浮槎下

柳梢青

閏中秋

雲外天香月中桂子又做中秋一曲霓裳三聲玉笛兩  
度嬉游披衣不用登樓但花下詩筒酒籌恐似前番  
金錢散落醉裏誰收

水龍吟第一體

中秋雨

廣寒變作陽臺朝雲暮雨姮娥隱羽衣霑溼霓裳罷舞  
桂花香冷水漲銀河烟迷玉兔天慳佳景總明皇欲試  
天師幻術恐路斷金橋引天柱如何得到賴知微攜  
尊同飲風生屐齒月圓谷口清輝滿巔瑤席當空瓊卮  
行露斗橫參近怕歸來又是滂沱黻黻閉門高枕

念奴嬌 第三體

中秋無月

平分秋色正年年此日中秋佳節欲向姮娥相問訊爲甚今宵無月掩盡銀蟾深藏玉兔無處憑圓缺繁絃急管暮雲推起千疊縱有江上濤聲天邊桂子冷落何須說樂事賞心還虧得筵上酒杯頻熱願學長鯨千川一吸醉上清虛闕瓊樓玉宇諒清光不曾滅

齊天樂

中秋泛舟

蘭橈六幅秋帆錦江上商飈清冷茶竈烟輕筆牀墨淡



泛宅浮家風景鱸魚切粉兼蓴菜紫絲推蓬小飲桂魄  
團圍廣寒宮裏天香近 武夷君在何處想雲袖寶座  
幔亭峰頂按節觀濤乘流弄月銀漢無聲高迴風和浪  
靜任珠露橫空金波千頃此夕中秋水仙能管領

醉紅樓

重陽

今年風雨讓重陽雁初飛菊正黃攜筇直到釣臺傍登  
眺處盡秋光 科頭長嘯髮蒼蒼任風起亦何妨望斷

白衣歸小徑成獨坐啟南牕

江城梅花引

九日雨

一天風雨菊淒涼近重陽竟重陽咫尺東籬徑溼鎖寒  
香誰趁白衣蓑笠至同攜手開柴門泛羽觴登高不  
得望高岡佩絳囊甫迎涼項羽臺邊空戲馬斷雁無行  
更向樓頭置酒擗羔羊桓景家中雞犬樂休出戶笑仙  
師費長房

點絳脣

小春

日瘦風輕小春天氣如春樂梅花開了香滿珠簾箔  
橘綠橙黃只道冰霜惡人不覺明朝上苑花底張油幕  
千秋歲引

冬至

亞歲書雲黃鍾應律繡線新添五紋刺南來晷長視八  
表西傾漏短名三極動葭灰懸風炭閉虛室 迎福履

相遺貴戚聽樂奏鈞天純繹萬國交章賀元歷天心自  
然生剝復羣陰那許長充塞一陽巾八音舞豆糜赤

迎春樂

除夕

桃弧棘矢懸螺首明日飲屠蘇酒椒花頌獻藏鈎手拌  
一歲今宵守 又早記年華插柳恰半月星迴南斗爆  
竹新年消息雷動三更後

杏花天

初春

迎春簾幙重重曉乍撲面東風寒峭霜花雪樹關山道  
轉眼王孫芳草 園林裏新鶯小小屋角外游絲裊裊  
紅樓從此風光好齊約鞦韆會早

畫堂春

春日

一簾花影弄新晴流鶯飛過身輕水沉初燼夢初醒無  
限春情 柳外高樓掩映橋頭野水空明尋芳何處踏

歌聲翻惹愁生

鶴沖天

春暮

鶯擲柳燕銜花撩亂到山家狂歌烏帽任欹斜把酒聽  
琵琶酒多少愁多少酒醒纔知春老對花舉酒向東  
皇春去爲誰忙

行香子

春曉

角枕齊齊錦帳低低傍溫柔夢醒還疑和風吹面朝日  
穿帷正蝶兒舞鶯兒語燕兒啼 獨坐牕西嬾下樓梯  
楚天遙草色萋萋輕烟未散綠暗芳堤看青門外黃塵  
起紫騮飛

夢揚州

春晚

好春華却裝成芳草天涯庭下簾前惹得心事如麻更  
孤立臨風無語落紅輕點牕紗呢喃燕銜泥罷差池又

向誰家 連日曾驅犢車看嬌鳥成羣啞啞啼花妙舞  
清歌斷送春色堪嗟漫天飛盡傷心絮朱閣扇淚眼難  
遮可能把明春麗景今歲先賒

如夢令

春夜

芸閣燈殘人靜睡鴨香銷灰冷獨坐不勝情牕外月光  
千頃佳境佳境更有梅花弄影

鬪百花



春夜不寐

歌枕渾無心緒愁殺春天難曙畫簾清月光斜官舍寒  
梅香度回想當年閣上暮火初紅掌底筆花方吐半榻  
聞雞處 五柳當門秉燭曾消酒賦風巖月岫夢中願  
尋歸路何事今宵黃紬被裏扶頭只聽閩山鐘鼓

惜分飛

春半

游興春天何懶惰能得花朝幾箇若要春愁破移春檻

裏開筵坐 燕燕鶯鶯啼向我滿院柳眠花驛晝夜尋  
花臥春光一半休閒過

蝶戀花

春晴

露檻風床珠玉散石燕飛回天上金輪見雨洗春天應  
好看新蒲細草清江岸 幾日不遊春已半趁得初晴  
重整青油幔贈芍采蘭溪渙渙紅妝扇底桃花亂

沁園春 第一體

春雨

楊柳垂堤葡萄上架春滿南塘却和風習習輕雲漠漠  
知時靈雨亂下高唐鬪草王孫踏青嬌女溼透花氈對  
夕陽開筵處有蜻蜓上下燕子顛狂 溪頭雙宿鴛鴦  
喜春漲平添近曉牕更園林無數樹頭紅冷枝間白嫩  
洗盡殘粧好把金壺早沽美酒雨後看春上野航偏成  
對是蝶兒輕粉蜂子新黃

天仙子 第二體

春寒

春山歷歷春波瀏青衫白恰隨春走無端幾日雨兼風  
生僂憊新花柳庭前簾下常垂首 雙袖了搗箏纖手  
冷透了調鸚素口金猊空熬水沉香寒時候愁時候杏  
花村裏沽村酒

女冠子 第四體

春雪

風光堪愛青天上彤雲無賴遲悞了酒緣花債紅桃翠

柳芳菲轉眼東皇顏色改玉屑天山滿飛甲龍初敗看  
青樓朱幌凝妝少婦光生銀海更燕子休巢鶯兒裏  
舌不似三春世界騎驢客杏花村外淺斟低唱帳下將  
軍翻自在學士風流細烹茶清閒瀟灑把前朝畱下雙  
柑斗酒圍爐相對

少年遊 第四體

春郊

沙暄野潤柳眉花眼併作十分春翠袖飄香紅裙映日

陌上看如雲 不晴不雨乍寒乍暖芳草藉花裊人醉  
玉樓馬嘶金埒薄暮轉城闈

越溪春

春景

彷彿河陽春事好開遍滿城花繡鞍金勒繁華子傍大  
堤撥盡琵琶士女香羅兒童竹馬閒踏桑麻 訟庭樹  
樹棲鴉玉燭慶年華有時習家池上一醉六街拍手誼  
譁爭笑山翁真醉倒落日接羅斜

慶春宮

春閨

豈蕊梢頭丁香枝上撩人一片春光懶繡文鴛間聽百  
舌猛添舊日愁腸章臺楊柳東風暖裊裊初長紅顏夫  
婿遠戍功名空老沙場金閨花貌堪傷錦帳三年玉  
筋千行碧海銀蟾雕梁紫燕春宵同守空房魚書雁帛  
封題了知有誰將萋萋芳草連天遠近直到漁陽

訴衷情 第四體

踏青

寶鞍金勒曉蒼蒼各爲踏青忙  
隔花鳥聲頻喚隨地是高陽  
歌一曲酒千觴春光莫教好景等閒負却回首情傷

西江月 第一體

鬪草

鏡裏鴉黃新點屏前鳳管俱停分  
曹覓草背人行穿入花蹊柳徑  
小小榆錢堪拾纖纖芹葉初生  
袖中拈出



鬱金莖使盡聰明心性

燕臺春

春興

城闕九重山河千里烟花分外便妍舞榭粧樓何人閒  
過春天鬪雞走馬爭先看玉河橋畔鳴珂穿柳刺梅園  
裏弄管調絃京華旅食紫陌紅塵春衣典盡酒舍因  
緣新豐羽騎官家校獵城邊燈火歸來遶鞍雞兔滿臂  
烏鳶謾高眠試聽鄰家笛張宴畱連

錦堂春

春懷

草上輕風乍暖花間日影初長粉墻露出鞦韆架牆外  
有垂楊鶯語對人宛轉燕飛穿幕輕狂昨宵做得還  
家夢早起賦山陽

江城子 第四體

春感

亭臯十里拾殘紅落花風暖溶溶記得年前沽酒畫橋

東憔悴今朝回首處烟草亂綠楊中  
香車寶馬綺羅  
叢恨匆匆隔簾櫳望斷暮雲春樹萬千重那有天邊青  
鳥信憑一枕夢魂通

南鄉子 第四體

春情

曉日滿三城春水如藍拍岸平架上酴醾開也未輕輕  
隨意尋花獨自行 竹徑露華凝啜茗焚香一味清捲  
起畫簾招燕子生生又聽黃鸝第一聲

南歌子 第三體

春思

柳眼搖新綠，花顏發早紅。  
橋邊油壁易相逢，那數繁華，  
撩亂大堤東。醉客清明酒，  
吹人上巳風。幾番清宴碧  
湖中，如今山居寂寞，與誰同。

唐多令

春懶

紫燕啄簷牙，游絲裊落霞。  
科頭立獨倚牕紗。底事今年

無好興常閉戶日西斜  
閒殺陌頭花空畱金犢車  
峨嵋老只在東家識得嵇康  
真是懶但攜手話桑麻

破陣子

春愁

門外落紅飛盡枝頭杜宇聲多  
料得春光難久任忍放  
筵前金叵羅傷心紅雪歌  
咫尺上林燕會暫時小苑  
婆婆買得青山開別業  
花謝鶯銷奈若何烟霞偏坎  
坷

臨江仙 第七體

春怨

宦海浮沉多歲月歸來三徑看松筠東風何事苦辭人  
窺簾鶯與燕相對也酸辛種得牡丹根未老教成歌  
舞曲初新蠅名蝸利不沾身如何愁病裏虛度一年春

二郎神 第二體

春恨

桃花開日有一箇內家粧束看幾葉春衫半鈎羅襪蘭  
麝渾身馥郁庭畔珊珊環珮響恁撩亂愁容堪掬便楊

柳蠻腰櫻桃素口伴人幽獨  
眉蹙如何雲雨高唐歸  
速聽杜宇聲聲香魂不返冷落今春  
板屋絃管輕風糴  
稔涼月無那慘紅愁綠黃泉下  
輕把人人斷送百身何  
贖

鳳銜杯

春病

畫掩重門愁自語前春不似今春  
苦任隱几憑欄支離  
憔悴渾難住看病骨如風絮  
斷腸天銷魂雨甚無端

惱人情緒縱柳下花前一時沒箇安排處向夢裏尋歡  
去

青衫溼

春別

萋萋南浦無情草何事滿天涯等閒催得王孫遠去甚  
日還家 徘徊岐路風前繫馬臺下停車除非醉後難  
開雙眼省了嗟呀

小桃紅



春遊

日暖亭皋綠桃李渾如簇  
步屨尋春一行紅粉香車金  
犢更前村窈窕舊當壚  
正甕頭初熟獨酌杯行速  
醉倒青山足待得醒來歸  
鴉滿樹疎星射目恐明朝  
陰雨陡然來倩誰人秉燭

倦尋芳

春旅

輕衫初試小扇初搖  
賞花時候美景良辰  
翻作天涯奔

走愁聽鶯啼窺燕舞關河落日頻回首甚今春向風塵  
碌碌兩眉空皺 記當年賞心樂事柳院花房約伴攜  
酒一曲高歌常得舒顏開口今日淒涼誰共過千紅萬  
紫偏如繡却連朝看青衫泪痕重透

西江月

春雷

半夜雷車驚蟄初春雨脚穿江梅花應已滿山香急駕  
蘭橈畫槳 一帶青山如沐半灣綠水停航白雲渺渺

雪茫茫明月天連紙帳

錦帳春

賞春

鴉散垂楊馬嘶芳草看萬戶千門初曉趁晴天攜好友  
共尋花聽鳥玉壺提了繚繞沙隄喧闐池沼論美景  
人生多少鳳簫聲金縷曲勸當杯歡笑玉山齊倒

木蘭花

惜春

日遲遲風裊裊滿院鶯聲啼不了梅似豆柳如綿枝上好花吹又少步芳園臨小沼春去今年何獨早送舊恨接新愁只恐容光容易老

河滿子 第三體

傷春

淑景朝朝易過啼痕面面爭流寒食清明都去遠風光煞是難畱苑外落紅萬點傷心莫上高樓杜宇喚醒午夢垂楊綰住春愁怪底年年當此際教人感斷眉頭

說與東君知道問他還忍歸不

黃鶯兒

送春

落花飛絮隨風亂輕暖輕寒綠柳紅亭芳草無人淒淒  
江岸見燕翦試雛飛蝶板尋香泛多應春去難畱爭向  
天涯殷勤遙餞分散來日信傳梅歸日風吹棟千山  
雲外烟景清和傷心水流瓜蔓嘆少婦曉妝樓游子玄  
都觀一樣夢遶陽關生把多情騙

鳳樓春

初夏

簾幙晝陰陰綠滿庭心懶行吟倉庚現  
睨帶春音穿戶對對相親想是春光去不遠  
向花下追尋漫開襟玉局瑤琴欄杆遍倚閒  
愁閒悶困人天氣難禁風動蝦鬚薔薇香透小園林  
北牕休啓梅雨霏霏

謝池春 第二體

夏日

石榴花下看日影知亭午湘簾展層波紈扇隨金塵簾  
捲薰風透坦腹堪清暑檢茶鐙添香縷小童睡去乳燕  
窺朱戶 從容瀟灑坐一刻懷千古娛客舊詩書學語  
新鸚鵡幽夢羲皇上五柳隨風舞竹初長蓮未吐池塘  
綠淺虧得前朝雨

憶秦娥 第二體

夏暮

水亭空荷花灼灼愁薰風愁薰風新涼一枕漸上簾櫳

初生螢火光融融  
夜來幾點隨西東  
隨西東輕羅小  
扇亂撲花叢

風中柳

夏曉

聽罷鳴雞又見風  
敲翠竹啟紗牕  
朝光四屋滂沱揮汗  
待蘭湯早浴喜書童煎茶正熟  
磅礴解衣難得玄冰  
一服笑行車侵晨轆轤澆花出戶  
倚徧藥闌幾曲看枝  
頭茉莉如簇



鷓鴣天

夏晚

荷葉田田小院陰  
雲峰纔散碧沉沉  
山堂送日西傾盡  
淨坐莓苔弄素琴  
蚊作市鳥歸林  
避風浴罷敞衣襟  
芳樽初試蒲萄酒  
枕上青奴伴醉吟

長相思

夏夜

著輕羅脫輕羅  
邀月傾杯夜若何  
搔頭好放歌  
對姮

娥問姮娥桂殿清虛冷氣多星橋有路麼

醉落魄

夏夜不寐

星稀露重風吹院外芭蕉動城頭鈴鐸聲相送薄醉還  
醒渺渺難成夢 紙屏石枕何人共舊愁未了新愁墮  
多情好月穿牕縫起坐牕前長笛無心弄

醉春風

夏日飲歸

月出天如曙雪巘笙歌度  
巨羅初放小風來去去去楊  
柳橋頭葡萄架下一身清露  
手捏齊紈素醉眼開雲  
霧晚粧茉莉滿街香住住住  
試看嬌娥納涼小坐拈花  
頻顧

醉桃源

夏日聞鶯

穿花蝴蝶滿庭飛  
雙槐綠正齊如簧鶯舌再三啼  
驚聞出絳幃  
梅子熟豈花肥春光去幾時  
暖風吹老鬱金

衣嗒嗒何處棲

搗練子

酷暑

寒水竭火雲升空坐山亭并水亭  
搖盡齊紈揮盡汗無由赤脚踏層冰

醉蓬萊

夏日遊湖

看遙遙北渚潑潑清光炎蒸不到綠舫輕搖向綠楊停

棹紅藕香中開懷散髮好臨波長嘯語向奚奴清閒執  
事筆床茶竈 試望蒹葭離披湖上荷葉荷花亭亭窈  
窕沙鷺溪禽勸擎杯一笑不用彈絃何須吹管聽漁家  
小調落盡紅輪踈螢幾箇又來相照

望海潮

夏日觀荷

若耶一曲西湖十里何須太華峰頭翠葉田田紅粧冉  
冉六郎近日嬌羞玉井藕香柔更凌波步步窈窕清幽

越女吳姬採花輕泛木蘭舟  
水宮仙子遨遊任飛來  
飛去野鷺閒鷗帶月夜舒迎風畫卷漢家別樣風流綽  
約待凝眸  
趁良宵美酒醉賞消愁  
莫待紅衣落盡對高

秋

燭影搖紅

夏日采蓮

雨灑橫塘芙蓉朵朵嬌  
含露輕衫窄袖上蘭舟  
搖蕩花深處翠蓋相牽  
休住聽歌聲更尋前路  
風生柳下日落

溪頭紅粧徐步 撩亂心情對花攀折都成悞碧天新  
月動波光恰似催歸去手把碧筒四顧酒須沽酒家難  
遇船頭斜轉撥刺一聲鴛鴦飛過

踏莎行

夏夜露坐

露墜紫髯風吹白面清涼閒却桃花扇新蟬噪柳不會  
停疎螢繞竹時常見 月共追歡影堪作伴金尊在手  
何須勸庭空漫蕪水沉香醉來欲展蘄州簟

減字木蘭花

夏日納涼

火樞齊吐起手虧光能却暑雲樹迷離赤日當頭總不  
知殘書數卷展著桃笙消晝倦興味蕭疎似幅滕王  
蛺蝶圖

漁家傲

夏晴

牕隙日光圓似鏡垂楊洗盡春情性枝上鳥聲都不定



人寂靜單衣脫帽穿花徑  
戲著小童敲石磬青苔滿  
地沾泥淨茅屋常關欄獨凭  
須相迎袈裟風動花相映

菩薩蠻

夏雨

遠山陣陣陰雲起芭蕉聲碎  
愁人耳閣外小溪平溪船  
罷採菱碧山空對面白鳥飛  
還見惱亂野人家風吹  
處處蛙

繫裙腰

夏寒

薔薇開謝麥秋天那堪風雨連綿前朝初試羅衫好到  
得今辰又難耐晚風前 檻外荷花抽嫩綠新葉大總  
如錢鴛鴦一對渾忘冷尚宿池邊看雙戲處碧波圓

繡帶子

夏郊

梅雨乍晴天隴上麥漸漸是處綠肥紅瘦血淚溼啼鵲  
玉勒錦鞍韉章臺下醉拂金鞭東門綦縞輕翻羅袂

一晌畱連

生查子 第一體

夏景

人靜綠槐天點檢  
輕羅好莫放畫簾垂  
乳燕雙啼早  
琴韻奏南薰  
日斜猶未了  
回首看茶鐺一縷清烟裊

八六子

夏閨

看牆頭前朝李樹桃花  
斷送風流  
但枝上烏鶯朱槿池

中魚戲青蘋薰風滿樓  
多情望斷牽牛早起獨開繡  
帳夜眠誰共香篝孤負却牕前一床湘簟夏日原長今  
年覺短更兼小膽空房易怯脩眉照鏡生愁瘦堪憂腰  
肢不待高秋

浣溪紗

夏興

叢槐滿徑野花香乳燕驚飛出畫梁  
冰肌玉骨自生涼  
鵲尾爐中灰未冷水晶箔外日偏長  
浮瓜沉李坐匡

牀

小重山

夏懷

五柳陰陰罩小牕  
夢回殘卷盡對斜陽  
誰家河朔共飛觴  
銷愁處漁唱滿滄浪  
重坐竹方床  
七輪丁緩扇進  
風涼惠山泉煮紫茸  
香看新月影落鬱金堂

雨霖鈴

夏感

捲簾開幕下堦穿徑搔首寥廓薰風處處吹面今朝何  
事此心冷落嘆息東流往蹟正難禁寂寞念天生吾輩  
情鍾蓬山萬里成離索花前月下須行樂却無聊望  
斷西飛鵲一杯酒醒任羲皇解不去心頭惡散髮披襟  
待要說與北山猿鶴怕草堂勒字山靈怪我多情錯

蘇幕遮 第二體

夏情

畫簾低人語悄楊柳枝頭送得薰風到出水青青蒲葉

小荷葢高擎下宿鴛鴦鳥 日銜山月印沼隱隱輕雷  
蟬竦西升了疎雨無聲微著草睡向方床幾點螢光早

夏初臨

夏思

日透叢槐蟬鳴高柳碧紗牕戶風生玉骨清涼遲遲午  
倦釵輕合愁斜倚銀屏看雙蛺蝶多情黃金檻外湘  
妃簾底不耐閒行 夢沉寒玉灰冷爐烟金針閒却繡  
線飄零粉慵朱嬾臺前鸞鏡空明淚眼盈盈伴孤眠朝

燕昏螢甚炎蒸追思往事意冷如冰

滿江紅 第二體

夏怨

蝶粉蜂黃纔過了牡丹天氣朱檻外石榴紅綻照人衣  
袂芳草堤邊鴉影亂垂楊岸上鶯聲碎正新裁紈扇手  
中攜槐陰憇花已落門空閉常禁受愁滋味更雨意  
雲情許多無謂搔首看天忘日午引盃獨酌難成醉到  
不如重到北牕前昏昏睡



釵頭鳳

夏愁

珠簾箔金跳脫避風臺上羅衫薄爐香燼園花隕一同  
冷落夢魂難近恨恨恨思綽約增離索象床繡枕渾  
如昨人瘦損衣寬褪花晨月夕淚珠偷拭悶悶悶

烏夜啼

夏恨

鸚哥尚喚琵琶晚風斜記得年前同坐碧牕紗  
簫已

斷人不見向誰嗟  
欄外那堪茉莉又開花

謁金門

夏病

春乍去畱得一天飛絮  
寂寞眼看腸斷處  
能經幾朝暮  
玄鳥歸來初乳消瘦  
那知如許無賴杜鵑啼  
更苦催  
愁來院宇

夜行船

夏別

烟柳河橋無數纔折得淚痕如雨人生偏是別離多夢  
飛南北東西路念相守又幾經朝暮天涯外任君游  
去但願秋來不寐時也念人相思辛苦

### 金明池

#### 夏游

荷淨追涼竹深畱客苑裏花如迎送啄盡麥英

櫻桃也

烏

鵲亂只怕鬧醒佳人夢買百壺美酒如泉聽罷了子野  
胡床一弄更寒水調冰鉛刀雪藕強似笙歌歡縱  
河

朔人人持碧筒那柳下嵇康蕭條誰共接羅好向高陽  
倒褌襪莫作窮途慟奈飛雲過雨時來覺詩思無端且  
偷閒空任折角前村披襟南陌也索醉眠休動

黃鐘樂

夏旅

他鄉不覺試絺衣瀟灑襟懷北牕高卧亂鶯飛莫嘆山  
川非故國麥秋梅雨掩雙扉避暑休思褌襪歸纈夏  
逍遙冰心一片客中稀夢到匡廬看瀑布旅吟時學謝

元暉

婆羅門引

賞夏

山園槐序綠陰濃處  
曉鶯啼水絃聲動  
柔莢不覺松風  
入戶爽氣接峰西  
看清塵辟暑倒插簪犀  
湘簾乍低  
怕日午夢還迷  
漫把綠熊簟卷翡翠觴  
攜追涼河朔看  
雨過屋角挂虹霓  
紗牕外月滿青溪

水調歌頭

欽定四庫全書

十五家詞

三十八

苦夏

悶坐苦炎熱何日起清涼時時揮汗如雨閉戶懶衣裳  
總有浮瓜沉李未得水壺雪嶠倦倒竹方床欹枕看圖  
畫竟日罷焚香 夢飛瀑思露井慕幽篁漁歌嘹亮不  
知何處浴滄浪那得龍皮裁扇去覓驪山下榻一任日  
舒長無奈紅塵近心地若探湯

欽定四庫全書

十五家詞卷十九

休寧孫默編

陸求可月湄詞二

秋葉香

初秋

一葉梧桐飄未幾  
日月會于鶉尾白  
藏正值蘭秋美  
玉露金風如水  
琅玕青簾初收起  
涼來矣招搖西指銀  
河徙天上雙星歡喜

金菊對芙蓉

秋日

塞上風雲江間波浪兼天接地成秋看皂鵬振翮白鷺  
橫洲季鷹正憶蓴鱸膾冷芙蓉寂寞漁舟商飈起處誰  
家玉笛吹徹高樓 遙想白帝城頭聽砧聲急擣驚散  
沙鷗嘆東墻宋玉獨鎖閒愁晚來大火流西極敢天孫  
望斷牽牛紛紛白月絺衣蘿薜更上簾鉤

望遠行 第一體



秋夕

耿耿銅壺滴漏長  
虛空萬籟清商攬  
衣起坐碧紗牕  
疎螢竹裏暗偷光  
明月上廣庭涼  
早桂霏微遠香曉  
來斗轉動東方  
西山熏氣接蘭堂

百字令

秋曉

金天高處漸高風  
習習吹晞珠露  
暑氣全消  
庭院靜蘭室  
佳人遲寤  
砌葉翻風  
簷梧飄樹  
乍展凌波步  
新添半

臂早涼已透朱戶  
呼婢煮茗焚香疎鐘乍歇旭日簾  
櫳度開鏡菱花清影瘦好似隔溪鷗鷺試理雲鬟凌輕  
寒掠鬢罷頻回顧一番憔悴未如神女朝暮

憶王孫

秋晚

廣庭雲漢晚昭回珠箔銀屏向夕開  
新詠攜誰上玉臺  
獨徘徊月裏聲聲送雁來

梅花引

秋夜不寐

露花香露衣涼池上芙蓉欲避霜  
玩清光玩清光何處  
雁歸月明人斷腸  
疎鐘敲醒黃昏醉  
疎砧敲落黃昏  
淚漏聲長漏聲長  
生怕夢多薰籠閒半床

風流子 第二體

秋夜詠懷

西風殘暑盡斜陽外  
細雨落虹霓見  
旅燕欲歸賓鴻初  
動攀銀漢杳掛玉繩低  
乾坤靜寸心千古恨  
孤夢五更

啼波起洞庭氣吞雲夢登山臨水遠送將歸  
夜涼堪秉燭筭前事何異雍瓦裏醢鷄最愛白蘋南浦黃菊東籬  
聽西堂蟋蟀侵尋歲暮茨菰葉爛蓮子花稀惟有姮娥  
解事畱照深杯

清商怨

秋夜花下

小庭露重花知否睡一溪楊柳月裏開尊佳人間雪藕  
浴罷香來螭首且潦倒風前殘酒疎影依人烏鵲棲

枝久

解珮令

深秋

碧梧棲老黃花序歇總義和無計將秋閨白帝回車又  
早是元冥乘運嘆蹉跎玉關芳信哀蛩悲砧寒蟬抱  
葉看飛蓬渾如雙鬢前日登高可畱得茱萸佳醞解愁  
腸且防寒近

江城子第一體

秋晴

畫簾高捲對秋江  
敞虛堂過斜陽芙蓉池館一帶碧紗  
牕爽氣迎人山色遠晴浴鷺下雙雙

憶帝京

秋雨

水雲愁鎖烟鴻路淹滯上林尺素溪漲少蓴鱸天遠多  
鷗鷺寂寞蓼花灘簑笠漁郎渡望不見銀蟾玉兔更  
莫辨金風珠露晨井梧飄晚江楓冷慘悵巫峽連朝暮

豈有洛神來笑展凌波步

上行杯 第一體

秋寒

秋到蓬壺閭苑神仙境容易生寒玉液瓊漿傾未已  
何妨薄醉擣元霜游素月喜悅香熱綺戶盤桓

御街行 第一體

秋郊

秋風寒露滋芳草綠滿西郊道提壺樹底愛新涼酌酒

先迎少昊莎雞催織流螢改火秔稻香生早  
班荆不讓春光好月裏霓裳勝十洲三島更東臯釀黍南村剝  
棗漁樵歸晚詩書夜讀沮溺何曾老

贄浦子

秋景

白露點紅衣輕雲隔隴飛寂寂梧桐院遙遙楊柳溪  
看罷落霞孤鶩立殘秋水長堤回首柴門外蟬聲落翠  
微



越溪春

秋閨

漁火江楓鐘早動晚色入高樓臺前玉鏡明如月牽衣  
坐慵自梳頭織錦機邊乘槎海上惹起新愁 多時不  
理空篋羅幌擁清秋堤上半黃半綠柳樹春前曾繫驂  
騶憑仗西風吹妾夢隨他直到涼州

漢宮春

秋興

秋色無涯正蒹葭采采鷺羽飛飛繞見開襟樓上露重  
星低又中秋月轉銀盤槎客方歸潦水靜寒潭照影丹  
楓亂點人衣 對此天清氣肅便籃輿乍登勝地追隨  
看他漁舟初唱雁陣初齊陶然共醉語騷人漫賦心悲  
更待那松間黃菊開時穩臥東籬

相思兒令

秋懷

莫道秋風無力吹起滿天雲簾外垂楊芳草綠減兩三

分 燕子不戀斜曛寒蟬鳴向何人無邊落木蕭蕭月  
中亂打柴門

玉蝴蝶 第三體

秋感

昨夜紗牕風急畫屏幾曲乍繞牙牀侍女薰籠徹曉斜  
倚天香海棠畔吟殘蟋蟀蓮葉下睡足鴛鴦步池塘滿  
園積翠一榻新涼 堪傷關山千疊素娥奔月青女催  
霜雁帛魚書坐孤幃盼盡斜陽感恩私吹笙北里勞夢

寐弄笛西羌九迴腸  
轆轤高轉井冷梧黃

甘州遍

秋情

良宵永秋氣入銀屏  
撲流螢梧桐樹下芙蓉  
溪上有人乘興坐搗箏  
風淡淡水泠泠手持生  
絹紈扇仰面看  
雙星愁無定醉酒不  
須醒嘆多情悲哉宋玉  
嘹唳雁南

征

烏夜啼

秋思

啼痕宛似幽蘭露華殘正是相思哀雁叫雲端  
團扇恨分鏡淚向誰彈方寸容愁寂寞倚闌干

拜星月慢

秋愁

烟草催黃風蒲駐綠幾陣金飈刮面蛩語猿啼鬧幽人  
庭院漏聲永叉手瑤堦玉砌唯有關干倚遍露白天高  
看寒生翠幔  
算爲歡有紅裙輕艷更休道歲月如馳

電可奈回首生平苦風流雲散入秋來向地消愁嘆帶  
移孔瘦骨剛餘半又那堪轆轤聲聲轉晨昏不斷

感恩多 第一體

秋怨

眼前多少淚鴻雁知人意強攀叢桂枝皺雙眉 池上  
風帷月帳斷蓬飛斷蓬飛錦字詩成寄歡向日歸

遐方怨 第二體

秋恨

蟬寂寂雁嗷嗷明月催文杵清風送玉簫青天碧海路  
迢迢雙眉長皺可憐宵人易老恨難消枕上三聲淚  
江頭萬里潮疎疎涼雨落芭蕉夢魂何處破牢騷

河瀆神

秋病

疎雨灑寒氈西堂欹枕孤眠休文剩骨對高天蕭條不  
比年前青銅照淚如流霰惱他避人秋燕潘鬢不堪  
重見加餐何用相勸

瑞鷓鴣 第二體

秋別

微霜落處唱驪歌  
遙天愁望洞庭波  
執手臨歧衰柳殘  
陽下瞬息天涯可奈何  
歡娛猶記前宵月  
廣寒笑指姮娥何期此日  
淒涼怕動離鸞操  
夢應多白月紛紛掛  
薜蘿

最高樓

秋遊



花柳市轉眼見秋光遊興不尋常波心菰葉沉雲黑風  
中蓮子落衣香約同人張翠幙宴高陽 泠泠處子猷  
堂上竹蕭蕭處陶潛徑裏菊須相對莫相忘桃花扇舉  
笙方奏泥金帶緩曲初長儘流連詩警策酒顛狂

高陽臺

秋旅

華髮秋生故園天濶涼颼幾日驚心潦倒登臺南魚北  
雁沉沉聽猿欲下懷人淚況城頭夜半笳音問前朝何

事長亭輕自分襟 巫山巫峽蕭森便兼天波浪接地  
風陰憔悴難堪空閒匣劍囊琴江頭楓葉停車看抵來  
時紅杏春深夢中行家山易到隔斷聞砧

雨霖鈴

賞秋

蒹葭搖月喜金風度暑氣初歇暮峰雨後凝紫正鱸膾  
美蓴絲肥滑水榭開筵宴飲向西山拄笏望河漢尚隔  
微雲一帶平塘好林樾 酒行莫避深盃罰賽清虛玉

宇瑤天闕最宜秉燭莫問銀河外斗橫參沒斷續笙歌  
總把單于小調吹徹嘆寂寞思婦含情織錦悲離別

昭君怨

苦秋

十日九多風雨盡足引人愁緒何事廢清吟爲秋深  
兩岸丹楓冷落一徑黃花寂寞我欲倒千鍾向新豐

後庭花

初冬

菊花輕送清秋別，霜風烈烈天外孤。  
鴻愁欲雪初冬時，節高陽攬轡陰雲結。  
游人停轍橙黃橘綠如春熟，暗香徐蕪。

望遠行

冬日

十二屏山曲曲遮，秋色去應賒。  
黃綿襖子落簷牙，嶺上北枝花。  
寒雪霽鷗鷺，輕水沉一縷。  
淒清床頭蟋蟀久無聲，那得重看鶴氅行。  
冷逼鴛鴦瓦，呵手破香橙。

萬年歡

冬夕

序屆安寧正北郊車馬先迎顓頊日短須臾永夕遨遊  
繼燭煖室重鋪繡褥看長短妓圍如玉博山內五夜添  
香殷勤更進醞醖更深漏促鴛鴦瓦冷霜華重莫親  
碁局玩月無心只是早歸金屋何處按歌擊筑上雲奏  
鳳來清曲忽報道王子猷船冒寒來訪空谷

丹鳳吟

冬曉

聽足鷄聲三唱翠幔開時東方初白金爐香燼寒氣逼  
人床篋愁多起坐可憐孤負角枕疎紋鴛衾新色細憶  
清宵好夢邂逅綢繆忘却分判南北料得此時邸舍  
也應數盡殘漏滴甚日金閨裏共調冰重畫眉黛寬窄  
樹頭鴉起誤認雁傳書帛慢自披衣牕外望初日驚殘  
魄朝餐空設只念蕭關客

相見歡

冬晚

洵寒容易斜陽小春光笑指東園桃李鬪青霜  
堦北戶閉西室坐南牕無數歸鴉落木半林黃

金蕉葉

冬夜不寢

挑燈與室圍爐坐數更漏銅壺滴破撥盡寒灰蘭膏未  
滅生花大照見影兒一箇手冷無心連夜作好花枝  
停針無那密掩牕紗曉來怕有霜風過且自和衣欹臥

太常引

冬夜詠懷

肉屏風外落羲和月姊出銀河酒價減些麼裘未敝千  
錢更多 柔荑乍凍凝脂欲裂短鬢又婆婆玉漏永如  
何難得曙愁人放歌

洛陽春

深冬

日月玄枵相會冬深無奈祇須酌酒更重裘看松栢冰



霜外 歲暮星終寒大朔風吹籟好畱顏色待新春試  
預結同心帶

華胥引

冬晴

玄冥久溼后土初乾同雲飛盡赤鳳歌回開爐好試梅  
花醞應有雲物堪書見征鴻成陣背負暄和獻金門莫  
須吝 日淡風微幾番疑紗牕春近摩霄羣鶴翅雙開  
畱餘潤石燕淋漓歸後一床殘緼社結烏金前溪溪路

堪認

玉堂春

冬雨

同雲忘凍密雨廉纖飛動寒色侵人正好飛觴鳳炭紅  
生共約檀爐會莫聽空堦滴斷腸一望江南烟鎖飄  
零病葉黃遙想長安天氣高寒處早慶豐年雪片狂

永遇樂

冬日看雪

瑞葉飄零瑤花浙澀旋隨風舞暗度南樓寒深北嶺圓  
璧方珪處歌臺密灑僧寮深擁畱得袁安環堵試凭高  
一舒老眼皓鶴白鷗失素 月明林下梅開山上漫道  
撒鹽飛絮三白雖宜九衢欲凍嘆息貧家婦淺斟低唱  
將軍稱快不見糾糾葛屨凝望裏侵凌萱草壓欹柳樹

一叢花

冬日踏雪

六花堆積滿乾坤一色更無痕但分山水高低處與林

廬城郭江村蠟屐扶筇印生履齒回首失柴門 不知  
明月照黃昏步步踏瑤琨誰憐東郭先生苦偶行吟露  
出鞋跟莫笑孫康讀書相映不復問饕飧

蕃女怨

冬郊

鬪雞走狗東郊道朔風吹老傍溪楊夾岸草烟雲空繞  
何時萬紫與千紅待春工

歸自謠

冬景

聽蜡鼓一國若狂分隊舞金剛力士收南畝  
村前村後歌金縷風和煦流連不覺嚴寒苦

賀聖朝影

冬閨

繡床初放翦刀寒帶圍寬筆尖呵凍寄書難且盤桓  
推牕又見蠟梅殘鏡中看下堦不耐朔風酸葉聲乾

陽關引

冬興

蒸裏前朝設迎得玄冥節口脂面藥恩光遠空悲切念  
東梁詞賦惟有鄒枚絕筆吐花庭樹不斷兔園雪對  
四壁僵臥歌一闕看浮生內能逢多少風月且莫耽清  
酒但許烹茶啜縱妓圍成陣不若慕彈鋏

青玉案 第一體

冬懷

層冰已合關山道望不見王孫草紫塞蹉跎芳信杳月

中砧杵霜前刀尺終歲縈懷抱 苦寒不散鄒陽老怎  
黍谷移溫早翦綵爲花裝綴好灞橋驢背梁王兔苑遠  
似蓬瀛島

中興樂

冬感

却寒簾外六花飛歌臺舞榭全迷煮酒烹羔呼妓成圍  
紅冰滿袖淋漓欲流澌灞橋黯慘騎驢向往詩思遲  
遲

一翦梅

冬情

投衣節後降霜嚴，深下羅幃，不掛湘簾。依人蟋蟀下牀鳴，斜倚熏籠，暗把香添。夜長正值一陽潛，漏水丁丁，愁上眉尖。情深贏得瘦腰肢，那得梅花，索笑巡檐。

望遠行 第一體

冬思

睡鴨香殘夜似年，嘹唳征鴻滿天。玉樓凍合聳鳶肩，剡



溪空待子猷船  
燒瑞炭擁寒氈  
幾樹梅花更妍  
旗亭酒價十千錢  
雙鬟作陣要人憐

聲聲令

冬愁

幕收牕閉天喜嚴寒羲和不暖  
老柴闌白檀灰冷風吹  
面覺衣單最不堪  
歌罷酒闌雪到闌山  
憔悴久不曾  
還泥塗濡滯客行難  
天高雁遠倚闌干  
淚偷彈空半床  
被冷香殘

塞翁吟

冬怨

強起凭高望，唯有落木寒鴉。曝背坐野人，嗟遠渚，亂葦  
葭。梅花紙帳風淒緊，樓外冷日殘霞。對短景，煖爐重會  
村酒頻賒。堪誇隋宮樹，宵深翦綵游上苑。春知放花  
正晚去，江山似畫，乘清興，度臘藏鬪。掃雪煎茶，扶餘貢  
玉黍，谷吹簾寒落誰家。

楊柳枝

冬恨

庭前又放款冬花  
蕩子年年不憶家  
絕塞應無新歷換  
空教白髮老天涯

燕歸梁

冬病

秋去多時病轉添  
獨坐懨懨香銷久  
閣白牙籤梅已放  
怕鈎簾  
少陵藥餌憎加減  
無聊賴  
月窺奩欲除宿障  
此情收須並坐執摻摻

連理枝

冬別

水落河梁淺攜手殷勤餞歲寒三友青青不改臨歧相  
勉看天涯臘盡又開年莫勾留婉孌別淚冰雙泣音  
信憑黃犬空閨添線黑金作社如何消遣遇當壚休典  
鷓鴣裘盼陽和未轉

品令

冬遊

水雪溪山淨却引起遊人興  
軟裘輝映煖爐舊會臨期  
重訂便上籃輿早看盡三冬景  
春花秋鏡雪中賞皆  
佳境况前溪一樹梅識得風流情性  
斗轉參橫何異羅  
浮初醒

戀繡衾

冬旅

天上星移節序催  
嘆行人終年不歸  
逆旅嚴風惡劣把  
鄉心吹得成灰  
故園相守風情好  
坐銷金共啟新醅

郵亭味空留戀獨徬徨愁思告誰

十二時

賞冬

朔風初改玄冥節天氣寒凝牛斗好宴樂幽風朋酒萬  
寶告成時候田畯築場農師納稼上下歡爲壽食黍蕪  
其味宜鹹天上虹藏閉塞漸交子丑 駕鐵驪雉沉爲  
蜃麋角解于林藪薦廟嘗魚休教冰盛凍斷漁郎苟合  
樂師大吹綴恩不棄白叟 屈指來黃鍾大呂歲暮儘

堪消受半夜陽生天心來復至日看長久坐待嘉平過  
渡江又多梅柳

贊成功

苦冬

冷侵池館凍徹關山玉塵萬斛白漫漫黑貂久做獸炭  
新殘清威勁氣行路艱難眼前願得廣厦千間幘幘  
寒士雪霜顏旋調湯餅乍刻瑤環絳衣葛帔破涕爲歡

柳含烟

贈別

花時節聽啼鶯何事春風無賴陌頭輕送遠遊旌暗傷  
情搖蕩垂楊千萬樹正是離腸斷處不如醉倒在旗  
亭看青冥

歸國遙

餞別

楊柳繫得王孫金勒否眼底一杯春酒和淚擎在手  
歎息歡情難久關山又輕走從今一旦別後沈腰終日



瘦

南浦

惜別

屏營歧路聽無情  
羌笛奏驪歌  
極目遙遙楊柳濃  
綠滿關河  
試問傷心何事爲  
臨風無計挽鳴珂  
縱知有後期  
難分此際哽咽語偏多  
嘆息年時行樂到  
如今無那別離  
何且看猿啼客散  
寒水又生波  
從此漸容光瘦減  
春花秋月怎消磨  
願一身化作黃鸝  
同子出巖阿

霜天曉角

問別

青衫白氎今日何爲別  
滿眼輕塵朝雨烟柳絲絲結  
此恨如何說春林啼百舌  
只好仰天大笑看明月猶圓  
缺

新荷葉

畱別

綠柳紅亭安排一帶離  
愁濁酒清歌賓朋幾日追游臨

歧近綢繆繾綣淚灑芳州奈何頻喚光陰去也難留  
執手淒其如何輕上蘭舟對景纏綿感君贈我吳鉤陽  
關西去三疊罷誰把箏搗驪歌幾曲持歸藏在高樓

意難忘

憶別

草滿池塘正年時執手惜別時光畫橋文杏細烟渚柳  
絲長蜂欲亂蝶初狂都爲早春忙奈寸心纏綿往事無  
限思量 天涯雲樹茫茫漫登山臨水立盡斜陽離鶯

空自嚙別燕不成雙  
凝望處九迴腸  
但夢到東牆  
只索  
要尋花歸去同醉高唐

傳言玉女

愁別

淒切寒蟬怎慣向  
離人噪紅蓼堤邊  
接長途浩渺  
匆匆  
灑淚何日披雲同  
笑賞心難共  
良辰孤了  
頃刻天涯  
聽陽關愁悄悄  
丹楓黃菊送驂騑  
就道頻登高處望  
不見行人杏園圍  
明月今宵分照

接賢賓

別思

銷魂橋上落花紅  
正春雨春風躊躇野立溝水一任西  
東鶯鶯燕燕空旋繞難畱行客芳蹤  
但願石尤平地起暫時且共從容酒盈樽  
人對面聽細語喁喁

爪茉莉

別情

揮手登車聽愁人隕淚天涯遠  
君行何意綠波碧草都

只向長亭點綴須知道不免分離但將玉驄暫繫金  
尊銀燭話綢繆解雙佩蒲柳質等閒憔悴鸞簫象板只  
堪同我昏睡料此情不比悲秋滋味教人無計可避

應天長 第一體

別懷

黃鸞喚起清明雨一棹烟波從此去夢何依花無主十  
二屏山遮宿霧鳳孤飛鸞獨舞杳杳相思難度歌著  
枕兒眠處何人知別苦

鳳凰閣

別怨

怨才郎薄倖去如兔脫昨朝今日成吳越總有良辰美景難慰飢渴空斷送冬裘夏葛多因佻達孤負深閨感頰年年夢裏尋生活憔悴處一天愁訴與菩薩止靠著慈悲定奪

別銀燈

別恨

朱戶春風吹透正滿目園林如繡嫩柳拖烟新蕙承露  
何事輪蹄奔走風前雨後生受了別離倥傯陌上金  
車馳驟處處尋花載酒魂銷黯然勞勞亭畔歌罷不堪  
回首香塵掃否怕遲了歸來時候

東坡引

離思

梁間雙燕宿迴身守空屋那堪夢斷風搖竹春來髮曲  
局春來髮曲局綠牕幾扇湘簾一幅盡日伴人幽獨



黃昏不覺愁伊鬱夜長空秉燭夜長空秉燭

婆羅門引

離懷

青青楊柳送行人南北東西門前征馬初嘶慢唱陽關  
一曲手捧白螺杯不愁君遠去但恐歸遲飄然路歧  
知此意只金徽看取雙雙瓦雀對對鳧鷖波心爭浴便  
朝昏那有斷腸時怎人生慣見生離

夏雲峰

離情

路漫漫何事間隔了彩鳳脩鸞錦瑟多時冷落愁起無  
端杜鵑聲裏催不轉寶馬雕鞍生受那風帷雨帳五更  
寒不堪帶緩裙寬倩魚雁傳書遠向關山看過春花  
燦爛秋月團團香閨愁絕難得瀟灑盡情歡試說與馳  
驅遠客應也心酸

畫錦堂

旅情

紅綻梅肥綠垂笋折風光處處關情懊恨此身無定泛  
梗飄萍悔別溪山隨馬足慚窺鬢影伴啼鶯關河遠春  
樹暮雲時時搖亂心旌堪驚茅店月青山路多少霜  
跡鷄聲不信神州赤縣盡是愁城夢中常作還鄉客醒  
時仍逐衆人行須知道負却賞心樂事急問歸程

聖無憂

旅感

自古多愁處無如客舍難堪薄情一片雲遮面搖落在

江潭 杜宇空啼淚血春風不送征驂飛揚跋扈今如  
此搔盡髮髮鬢鬢

喜遷鶯

旅怨

來時路別時人記起便傷神長亭一望一回新桃李十  
分春 舞袖閒歌喉冷情共水流無盡蕭蕭孤館隔平  
津踏遍化衣塵

慶春澤

旅懷

短笛一聲殘星幾點遙遙旅思難禁落盡紅衣半籬叢  
菊堪尋烟鴻低度絳河高瀉千家月下聞砧長安行樂  
易蹉跎愁到而今 尊鱸正有思歸興記齋東竹篠一  
醉沉沉慚愧依劉隨他坐嘯行吟無情雙燕拋人去却  
纔知時節秋深向床頭預檢貂裘細點黃金

孤鸞

歸思

天涯回首見滿室伊威一池楊柳窈窕文牕重展畫眉  
纖手並坐蜀羅帳底說年來別離長久千種相思消盡  
紫玉簫雙奏 悔從前鹿鹿風塵走向月下花間兩眉  
空皺今日相逢樂比夢中暢否朱樓彩鸞同跨便何異  
結禱時候莫作長途虎兕把鴛衾孤負

解蹀躞

歸懷

惆悵一身輕似葉今朝纔住追塵逐浪回思無是處徑

裏一簇松筠眼前半斗良醞差無辛苦  
尋儔侶歸去  
來辭堪賦攜手披雲霧珠簾繡閣風景休輕負爲我語  
向多情不用瘦減容光雙棲如故

玉聯環

遠歸

玉關迢遞分雙燕風愁雨怨湘簾卷向百花前喜一旦  
重相見今日柳腰花面翻多嬌艷春鶯催得阮郎來  
便了却風流願

金人捧露盤

有感

晚風前朱樓下舊相逢正畫橋烟柳叢叢娉婷韻度鞦韆紅粉鬪春風雕鞍玉勒爲伊駐半晌從容嘆輕雲容易散琉璃破已成空奈多情李白桃紅朝朝暮暮鎖巫山十二高峰懷中點檢江臯珮惆悵墻東

青門引

書懷



心事眉先覺花裏獨登畫閣正當酒醒夢迴時一天風  
雨繞道衣裳薄 燕來燕去無拘縛隔斷珠簾箔無端  
花艷驚目却難遣一腔愁惡

獻衷心第一體

述懷

嘆滄洲行客虛擲年華飄泊處似楊花聽牆頭短笛城  
上悲笳離前事追記得淚如麻 湘水岸玉人家夢魂  
也畏道塗賒問何時紈扇遠餉秦嘉眉欲鎖腸欲結向

誰嗟

河傳

感舊

青鞋布襪春去秋來風塵追逐蕭條愁損顏朱鬢綠舊  
歡何日續長亭握手曾相囑歸須速今日空碌碌雨  
牕風館孤宿斷腸看淚燭

虞美人

第一體

懷舊

風流曾看凌波步  
契濶成孤負  
迢遙空自惹相思  
千行玉筋枕邊垂  
怕人知  
舊薰蘭麝  
今猶在人隔雲山外  
泥金帶子不成雙  
銀燈空守月昏黃  
恨更長

感皇恩 第二體

寄舊

誰喚兩車輪  
送來客邸  
欲不愁時  
又愁起  
一般好景柳  
媚花嬌無比  
奈迷離  
淚眼長如醉  
別日偏多歸期空  
擬問何事遲遲  
至此芙蓉屏下  
負却幾年羅綺  
玉簫空

奏曲人千里

師師令

春飲

杏花風壯村裏青帘颺酒徒結束趁晴光新製就春衫  
時樣畫榼提攜開步障列高陽池上綠雲清切歌聲  
上對天桃無恙踏青天氣麗人多鬪百草風流蕩漾強  
整接離杯不放醉後迴頭望

望梅

夏飲

朱明開席正荷香十里槐陰千尺向風亭捲起湘簾好  
箕踞科頭納涼畱客河朔風流每避暑盃盤狼藉况歌  
翻水調冰貯玉壺微聞香澤佳人素粧瑩白看醉眠  
如畫紗幘籠碧賽廣寒宮裏嬋娟喜瑣闥南有銀蟾流  
魄夢醒巫山驟雨過陂塘蕭索更移尊痛飲高枕雲溪

永夕

祝英臺近

秋飲

蓼花繁蘆葉冷秋色催黃菊  
秋雨秋風釀得新醅熟齋  
東竹篠沉吟鱸魚羹美開尊坐翠簾高軸清歌促漸  
看古道斜陽陰陰滿金谷白眼青天冷石醉中宿漫言  
歲歲悲秋百川一吸甚愁事得來心曲

滿宮花第一體

冬飲

杓鷓鴣杯鷓鴣一簇梅花無玉鳥程酒伴履霜來醉倒

松筠山塢 足冬三忘夜五寒卽糟床歌舞杜康城上  
少冰霜卿相肯畱圭組

側犯

勸酒

破除萬事人生莫放金杯淺游衍向月下花前畱醉眼  
舞餘春雪落歌罷秋波轉沉湎應勝似泥塗中冠冕  
調冰雪藕日日尋芳苑便教醉臥壚頭也是追愁阮愁  
對胡姬言賒覘覘鷓鴣裘在百壺堪典

粉蝶兒

詠酒

琥珀生光人人都道瓊液是杜康舊畱米汁但三杯歡  
情決驅愁無跡把醉鄉一路蠶叢獨闢坐醉行歌止  
容陶潛王績杖頭錢癡人省得喜糟丘千載後風流咫尺  
尺蓬麴車願新封酒泉國

踏莎行

對酒



花下卷荷燈前婪尾酒徒事業今如此葡萄何用博涼  
州我尋醉後無愁地 世界餘桃人情苦李一樽滋味  
真無比若教半刻巨羅空酒星應笑人癡矣

霜葉飛

止酒

眼花落井長安市仙人何年纔醒涎流膽壯麩車多引  
起持螯興頌酒德劉伶絕頂啜糟醜屈原三省看騎馬  
乘船又吏部軒軒甕底殺人風景 試問從事郎官青

州高縣何處醉鄉佳境當壚那有卓文君便不須酩酊  
想千日中山耿耿步兵厨下珍珠冷只索杯翻鸚鵡杓  
覆鷓鴣蕭然對影

芳草渡

曉景

星初落露初收離巢鳥過妝樓被翻紅浪獨眠愁多少  
恨何用說看眉頭屏山曲香斷續尋夢不思粧束人  
似病氣如秋難相見只獨宿淚空流

太常引 第二體

曉起

溫柔鄉裏怪天明  
奈樹上有啼鶯  
鴛鴦帳莫須驚  
交玉臂  
憐歡有情  
綠雲壓枕  
海棠春色同夢  
又同醒  
起聽捲  
簾聲  
問紅日三竿  
未曾

鳳凰臺上憶吹簫

曉行

店月催鷄橋霜送客  
半肩行李隨身  
正殘星欲沒  
斜漢

將淪但好暗中結伴認爾我總則非真長塗裏迎人起  
霧拂馬生雲 酸辛崎嶇尋路便好夢還家也自無因  
看東方初白却似斜曛回首長亭短驛都只有烟靄紛  
紛朝光啓鴉丁幾點飛出孤村

千秋歲引

晚景

隱霧孤城兼天遠水一抹微雲秋色裏紅纓鶚隨獵馬  
返黃蘆雁觸漁舟起滿江楓幾村柳鳥歸矣 隴上收

童行迤邐田畔老農歌  
懽喜共指餘霞散成綺  
開門細看山萬疊  
登樓忽憶人千里  
坐胡床吹橫笛徐烹鯉

千年調

晚行

終日戀迷途見夕陽將下便欲暫停行  
色酒舍瀟灑郵亭未到難解金鞍亂山叢裏共征夫  
催瘦馬鞭梢四指暝色生寒野  
幾處蕭寺寂寂暮鼓將打昏鴉古木此  
景真如畫向溪畔人家坐銷良夜

醜奴兒

夜景

叢叢水樹南村外望眼迷離新月來時畫得仙娥半額  
眉翩躚紅袖香風細笑語聲低紈扇初持教捲珠簾  
放燕兒

伊川令

夜行

嫦娥飛鏡寒光透溪路明如畫數著行人影瘦高臥如

何能穀蕭蕭吹鬢風驟若教偃仰在山園正歌罷挑燈  
看繡

紅林擒近

舟雨

落日迴船宴片雲頭上生菰葉波心亂蒹葭響處明荷  
邊鴛鴦乍醒蘆畔鷗鷺頻驚四面雲幔淒清艤棹近前  
汀翠黛愁眇眇紅袖溼盈盈回眸善睐風流猶弄銀  
箏看芙蓉紅透蘋花黃潤凌波如在畫中行

少年遊 第二體

觀雨

龍池出霧石郎戴帽雨脚半天生陰雲四合遙峰都失  
指點未分明 灑玉飛珠天弄巧細細落空庭清簾疎  
簾邊爽罷看花柳溼盈盈

東坡引 第三體

聽雨

繡衾斜倚坐瀟瀟幾番過初時還小後來大教人醒眼



臥教人醒眼臥 夢魂何苦楚  
雨師折挫儘浙瀝愁無  
那可憐滴得耳根破漏聲都聽錯  
漏聲都聽錯

春雲怨

苦雨

梨花欲雪正海棠初放芳菲時節莽莽天涯江上獨立  
洗殘花柳色過水黃鶯銜泥燕子碧鸛淋漓響空埵綠  
草池邊青梅樹下蛙鼓偏清越 胭脂零落花裊溼更  
平頭鞋子雙彎空設油壁鈿車去不得向晚西堂滴碎

鄉心布衾似鐵歌著枕頭數殘更漏楊柳芭蕉愁絕

清平樂

宮詞

西風裊裊吹老宮前草一幅鮫綃都溼了清淚不知多  
少夜深月暗燈昏庭槐亂落紛紛莫道君王難見有  
人朝夕承恩

六么令

宮怨

前頭鸚鵡莫自輕  
饒舌齊紈頓收篋  
筭減却三秋熱  
春日翠華來處  
烟草和愁結  
昭陽歡悅長門清靜  
斜抱雲和對新月  
歌頭曲徧重理  
冷落清秋節  
宮掖新樣蛾眉  
學得無差別  
莫道君恩已斷  
只怕頭如雪  
風吹簷鐵半床  
幽夢却有何人  
好明說

憶秦娥

閨情

霜楓落離愁  
掛在斜陽閣  
斜陽閣  
秋風禾黍茂  
陵城郭

茱萸灣口西風惡鴛鴦機上衣裳薄衣裳薄蒙砧何在空閨蕭索

唐多令


閨怨

衫子杏花紅新梳蟬鬢鬆畫欄前幾度春風試望勞勞亭下路人不見草連空  
夜夜夢魂中漁陽有路通到朝來依舊西東  
慎恨莫登高閣  
眺常錯認幾花驄

促拍醜奴兒

閨恨

平楚正蒼然驂騑一去放金鞭  
如今烟鎖行人路江頭  
隴上秋雲木葉離思無邊  
靈鵲噪庭前便安排錦瑟  
華筵朝朝空作凝妝望樓頭  
過了征鴻幾陣淚眼頻穿



十五家詞卷十九